

守山閣叢書

史集

守山閣叢書

支本

嶺海輿圖

質官箴以人事君蹇謬匪躬分也又矧厥監使一方慘舒
繫引養引恬保合其民而容蓄之每懷靡及周爰咨諏皇華
王命若是其重雖假寐有弗遑者疇非此心之運昔者宣公
陸子嘗告德宗矣曰五術省風俗八計聽吏治三科登俊又
四賦經財實六治保罷察五要簡官事經濟莫備焉斯一國
一代之政推諸天下後世無弗準矣夫此六者皆羽翼孟氏
鑿鑿可行贅其天下士哉顧爲政在人事豫迺立有宣公之
策無文正之憂徒法也有文正之憂無宣公之策徒善也徒
法則渙渙則民弗從徒善則執執則民弗喻二者得失相因
故君子懷古慨今與其渙也寧執予按廣今茲且暮年所謂
民隱吏治梳之爬之以求仰荅皇上惓惓斯民之念少追涓

欽定四庫全書提要

嶺海輿圖一卷明姚虞撰虞字澤山莆田人嘉靖壬辰進士官至淮安府知府是編乃其官監察御史時巡按廣東所作凡爲圖十有二首爲全省圖次十府十圖終以南夷圖圖各有敘敘之例首述沿革形勢利病次州縣次戶口次田糧課稅次官兵馬匹其總圖則首以職官以布政按察二司分統之蓋其時撫按皆爲使臣尙未定爲守土官也其南夷諸國列通貢者於前而通市者亦附後爲海防之計不論其奉朔否也大旨略於代而詳於當代略於山川而詳於扼塞略於職官而詳於兵馬錢糧略於文事而詳於武備於志乘之中別爲

體例然較之侈山水誇人物輯詩文者其有用無用則
迥殊矣意古者輿圖不過如是後來者踵事增華失其
本耳前有嘉靖壬寅湛若水序極稱之錢曾讀書敏求
記亦稱其簡而要云

嶺海輿圖序

甘泉子曰以予觀於嶺海輿圖而知王政之易易也夫嶺海輿圖何爲者也明心也昭制也明心也者以言乎其致善也昭制也者以言乎其行法也吾于嶺海輿圖之編也而知澤山姚侍御之善於巡廣之政之要也故以千言之博泛濫而寡要不若一圖之約目擊而意全有序有紀皆所以明圖也是故觀斯圖者其愛民憂國之心油然而生矣雖欲勿善得乎其大綱小紀之制昭然而見矣雖欲勿法得乎故澤山子本孟氏而言曰徒善不足以爲政徒法不能以自行一以治善一以治法法善兼全政治畢舉故曰以予觀於是圖而知王政之易易也吾於是編之簡約也而知澤山侍御之善於

巡廣之政之要也人謂澤山公發奸摘伏如神者非以是耶
考圖撫景自布按都三司而府而州而縣而衛所而合屬稗
官某也賢某也否而懲勸焉則其職官率屬信民之政舉之
矣入觀其疆而考其山川而物產而田里而戶口而錢糧課
稅之贏縮而振作焉則其足食之政舉之矣觀其府州縣之
官兵而考軍人民壯之消長馬匹器械之張弛而修舉焉則
其足兵之政舉之矣於制森然於心惕然而善法具備本末
兼該內聖外王之道舉之矣雖以措之天下傳之後世其可
也獨嶺海云乎哉是故觀言不如觀圖觀圖不如觀意故曰
書不盡言圖不盡意以意盡圖以圖盡言後之君子當以是
觀西村胡郡守鳳存心善政贊美斯圖請梓以廣其傳乃俾

陳司訓大章走甘泉之野請序其意於簡端云嘉靖壬寅季
秋四日賜進士出身資政大夫前南京兵部尚書奉勅參贊
機務國子祭酒翰林侍讀同修國史經筵講官增城湛若水
元明書

求其所缺於冊外可也

嶺海輿圖原序

有一鄉之政有一國之政有天下之政有一時之政有一代之政有千萬世之政政者正也正已以正人也作用岐途古今異尚久暫殊功心一而已子孟子涵泳聖涯抱道不辰貌一鄉一國天下之士而尚論焉誦詩讀書必求知其人七篇之說仁義道德藹如也其論政則曰有其心無其政是謂徒善有其政無其心是謂徒法徒善不足以爲政徒法不能以自行於戲盡之矣豪傑之士守而勿替措諸當世往往有大過人者先天下之憂而憂有本者如是苟亦徒法其曷以臻茲總總黔首孰匪同胞故君子雖棲遲畎畝恒志在天下國家樂堯舜之道將以唐虞斯世不肯自隘且自私焉矧旣委

質官箴以人事君蹇謬匪躬分也又矧厥監使一方慘舒
繫引養引恬保合其民而容蓄之每懷靡及周爰咨諏皇華
王命若是其重雖假寐有弗遑者疇非此心之運昔者宣公
陸子嘗告德宗矣曰五術省風俗八計聽吏治三科登俊乂
四賦經財實六治保罷瘵五要簡官事經濟莫備焉斯一國
一代之政推諸天下後世無弗準矣夫此六者皆羽翼孟氏
鑿鑿可行贅其天下士哉顧爲政在人事豫迺立有宣公之
策無文正之憂徒法也有文正之憂無宣公之策徒善也徒
法則渙渙則民弗從徒善則執執則民弗喻二者得失相因
故君子懷古慨今與其渙也寧執予按廣今茲且暮年所謂
民隱吏治梳之爬之以求仰荅皇上惓惓斯民之念少追涓

埃萬一之責惟時家室溱溱歲無荒厲蠲田蠲窟蕉林荔浦
聖化所被逃哉均矣過河洛而歌禹功有遐思焉爰卽所履
考成籍酌時宜作嶺海輿圖凡十有二幅各繫以敘以紀俾
昕夕顧諟以警惕厥衷予何人哉一鄉鯁生一時管見敢曰
一國之政乎又敢以達諸天下後世乎我憂孔疚將毋徒法
爾乎是故甚不得已也迺君子觀象考文沿時揆事神會而
加之意或亦少補於政其視十眉五客輞川愈疾雲漢北風
生熟生寒重輕緩急則自謂有間因屬胡守鳳梓之以告各
郡之守土者於戲輪轅之飾厚顏于有道者吾知不免諒其
心則幸矣賜同進士出身文林郎巡按廣東監察御史蒲田

姚虞煥

凡例諸圖不盈方尺故未盡者載諸序序或遺者載諸紀凡以翼圖也隨事起義有攸繫焉故先之以凡例

一 封疆廣袤形勝展促江海源委路道通塞關隘重輕民夷界限圖紀序互詳焉若山則圖其大者如羅浮庾嶺五指之類難枚舉也

一 布按二司各道俱詳記於總紀政所出也

一 各府衛首領并儒學司獄司陰陽醫學僧綱道紀司各州縣所屬印信衙門原有定額通省俱同茲不復贅止書倉場鹽場遞運所稅課司巡司河泊所水馬驛以其額設不同難以例見且關係兵食地里者故不可略各州縣有倉無官者不書

一 戶口田糧屯徵農桑豆麥商稅魚課并雜課各府既詳仍

括其數于總紀以便稽覈其雜課俱不分類但彙計之從約也

一前項等數雖各府所屬但總計之其詳則有司存

一官軍馬匹器械止據額數書之中間贏縮不常難以見在局之其達官旗目舍皆每年續撥來者原無成額今但錄其見在者以俟稽查其軍器各衛所俱同額數止總記于總紀下省文也

一各印信衙門已于圖中標出後仍紀其總額并轄于某衙門雖營堡關隘亦然不嫌冗瑣互相考見也

一敘紀中于各府衛及合屬印信衙門俱界以方格別省亦然其山海營堡關隘外國徭黎則界以圓圈別內外也

一民壯弓兵關係地方故特書之

一隘塞關津必詳標于圖以嚴備守其不能盡載者則詳于序序或不及詳者皆有總數表之若廣肇惠潮瓊等府屬縣多者亦每遺之勢也

一各府圖序俱擇其鄉賢名宦流寓人品功業之卓然者表之景賢示勸徵文獻也

一南夷圖止據本朝曾經奉貢及載在祖訓會典者書之其山川境土去廣邈遠皆難悉知今但據舊文附入亦不敢盡信若每歲進貢方物原無額數番船往來一無定期故船課止錄其槩云

一圖序紀所載諸事皆得之一時耳目未必無遺尙賴同志